



## МЕМЛЕКЕТ БАСШЫСЫ РУСТАМ МИННИХАНОВ ПЕН КЕЗДЕСТІ

Мемлекет басшысы Қасым-Жомарт Тоқаев Татарстан Президенті Рустам Миннихановты қабылдады.

Қасым-Жомарт Тоқаев Қазақстанға жұмыс сапарымен келген Татарстан Президенті Рустам Миннихановты қабылдады. Тараптар сауда-экономикалық, өнеркәсіп және технология салаларындағы өзара ынтымақтастықты нығайтудың перспективаларын талқылады.

Қасым-Жомарт Тоқаев Рустам Миннихановқа ілтипат білдіріп, Ресей Федерациясымен арадағы көпжақты қатынастарды дамыту ісінде Татарстанның маңызды орын алатынын атап өтті.

Мемлекет басшысының айтуынша, Татарстан Қазақстанмен экономикалық, өнеркәсіптік және технологиялық ынтымақтастықты нығайту деңгейі бойынша Ресей Федерациясы субъектілерінің ішінде көш бастап келеді. 2021 жылдың 11 айының қорытындысы бойынша өзара тауар айналымы 423 миллион долларға жеткен.

«КамАЗ» және «Татнефть» компанияларының қатысуымен машина жасау саласында құны 1,8 миллиард доллар болатын жобалардың жүзеге асы-

рылуы — осындай табысты ынтымақтастықтың жарқын көрінісі. Қостанай және Қарағанды облыстарында «КамАЗ» автобөлшектері мен «Татнефть» дөңгелектерін шығаратын үш зауыттың құрылысы белсенді жүргізілуде.

Мемлекет басшысы Қазақстанның инвесторларға, оның ішінде Татарстанның инвесторларына қолайлы болу үшін қажетті жағдайдың бәрін жасайтынына назар аударды.

Қасым-Жомарт Тоқаев Рустам Миннихановқа Татарстанмен бірлескен жобаларды жүзеге асыру үшін қосымша мүмкіндіктер туғызатын елде жүргізіліп жатқан ауқымды экономикалық реформалар мен нақты даму бағдарламалары туралы айтты.

Татарстан Президенті жылы қабылдағаны үшін Қасым-Жомарт Тоқаевқа алғыс білдіріп, қазақстандық серіктестермен ықпалдастықты нығайту жөніндегі бірқатар инвестициялық жобалар мен татар бизнесі жоспарының жүзеге асырылу барысы туралы мәлімет берді.

## ҚОРДЫҢ ТАҒДЫРЫ «ҚЫЛ» ҮСТІНДЕ



Еліміздегі ең үлкен қор Президенттің сынына ұшырады. Мемлекет басшысының «Самұрық Қазына» қырына алуының бірден-бір себебі — акционерлік қоғам жұмысының «көлеңкелі» тұстарының көп болуы. Миллиондап табыс табатын қызметкерлердің жұмысының тиімділігіне көз жеткізу қиын. Қордағы мемлекеттік сатып алу дегеніміз — аузында қара құлпы бар «алтын сандық». Президент қор жұмысына қатысты көп нәрсені өзгерту керек екенін қадап айтты. Күні кеше қор төрағасы ұйымды реформалау басталғанын айтты. Алайда ол реформаның нәтижесі қызметкерлер мен басшыларды қысқартумен ғана шектеліп қалмай ма?

Бұған дейін «Самұрық-Қазына» жұмысының тиімсіздігі Есеп комитетінің есептерінде талай айтылды. Сондықтан да қазір қоғамда қорды реформалау бойынша қызу пікірталас жүріп жатыр. Бүгінде бұл қордың активі еліміздің ішкі жалпы өнімінің 60 пайызы. Демек, ол тиімді жұмыс атқарса,

мемлекеттің экономикалық өсімі де қарқынды дамыған болар еді. Алайда ел сенген «Самұрық-Қазына» өздерінің қызметін ойдағыдай атқара алмады.

(Жалғасы 4-бетте)

## «ЖҰМАҚ» ІЗДЕГЕН ЖАСТАР



Соңғы 5 жылда Қазақстаннан кететіндер саны күрт көбейіп, келетіндер азайған. Жаппай тәртіпсіздіктер кезінде тағы 64 мыңнан аса адам елді тастап, кете барды. Әдетте қазақтар әлем елдерін бағындыруда, беделді компанияларда жұмыс істеп жүр деп мақтанамыз, ал олардың Қазақстанға қайтып келгісі келе ме? Әрине, кім қайда кетсе де, тосқауыл болуға, жазғыруға да хақымыз жоқ. Дегенмен Үкімет нені түзетуі керек? «Оралғым келмейді» дейтіндердің базынасы бар ма?

5 >>

## ХАЛЫҚАРАЛЫҚ ҚОҒАМДАСТЫҚ ПЕН ЫНТЫМАҚТАСТЫҚҚА ӘРҚАШАН ДАЙЫН

Бұл туралы Президент Қасым-Жомарт Тоқаев өзінің Twitter парақшасында жазды. Онда: «Қазақстан халықаралық қоғамдастықпен жан-жақты ынтымақтастыққа әрқашан дайын. Еліміз бен халқымыздың игілігі үшін серіктестерімізбен арадағы тығыз байланыстарды нығайту ісін жалғастырамыз. Біздің «ашық есік» инвестициялық саясатымыз да өзгермейді» делінген.

## МЕМЛЕКЕТ БАСШЫСЫ САММИТКЕ ҚАТЫСАДЫ

Бұл туралы Президенттің баспасөз хатшысы Берік Уәли өзінің Facebook парақшасында жазды. Онда: «Президент Қасым-Жомарт Тоқаев 25 қаңтарда дипломатиялық қатынастардың 30 жылдығына арналған «Орталық Азия – ҚХР» атты саммитке қатысады. Онлайн форматта өтетін жиынға Қытай тарапы бастамашы болды.

Көшбасшылар түрлі салалар бойынша Орталық Азия елдері мен Қытай арасындағы көпжақты стратегиялық ынтымақтастықтың даму перспективаларын талқылайды.

Іс-шара қорытындысы бойынша дипломатиялық қатынастардың 30 жылдығына байланысты Бірлескен мәлімдеме қабылданды деп жоспарланған», — делінген.

## ЖАҢА ҚАЗАҚСТАН: «ДИНОЗАВРЛАР ДӘУІРІ» АЯҚТАЛА МА?

Отандық ірі бизнес өкілдерімен жеке жүздескен Президент Қ. Тоқаев «жаңа Қазақстанда» бизнес үшін жаңа ойын ережелері қандай болатынын нақты айтып берді. Қазақстан байлығының жартысы небәрі 162 адамның қолында шоғырланған. Мұндай тәжірибеге жаңарған Қазақ елінде жол жоқ: ұлттық табыстың әділ бөлінуіне баса мән беріледі. Алайда жаппай «кәмпескелеу» науқаны да жүзеге асырылмайды. Осы орайда біз сарапшылардан бизнеске жолданған «меседждердің» мәнісі, жаңа Қазақстанның даму барысы туралы ойын білдік.

### ТОНАУ ТОНАУҒА ҰЛАСПАЙДЫ

Саяси ғылымдардың докторы Ермұхамет Ертісбаев ресейлік «Эхо Москвы» радиосына берген сұхбатында дәл Кенес кезіндегі «экспроприаторларды экспроприациялау», яғни қанаушыларды қанау науқаны болмайтынын мәлімдеді. Оның пікірінше, «Қ. Тоқаев олигархтарға тек шетелге өтетін қаражаттарын елге әкеліп, халықтың игілігіне, қазақстандық экономиканың дамуына жұмсауды жүктелді». Өйткені бұған дейінгі жылдары жүргізілген қаржы мен мүлік рақымышылығы тек заңсыз табылған қаражатты заңдастыруға ғана қызмет етті, капитал сол бойы елге қайтпады.

(Жалғасы 4-бетте)



## ЖАСЫРЫН ЖҰМЫССЫЗДЫҚ ЖАРҒА ЖЫҒАДЫ

Үкімет ашып жатқан жұмыс орындары халықты кедейшіліктен құтқара алмайды. Өйткені онымен күресуге жауаптанған ведомстволар нақты нәтижені емес, тек қысқарғанды әсер факторды таңдайды. Ал мемлекеттік бағдарламалардың арқасында өз кәсібін дөңгелетіп өсетіндердің көрсеткіші тым жұпыны, сондай-ақ жыл сайын оқу орнын бітірушілердің елеулі бөлігі жұмыссыздар армиясын көбейте түседі.

Қазақстан тәуелсіздік алғалы бері әлеуметтік мемлекет ретінде дамып келеді. Алайда қаңтар айының басындағы трагедиялық оқиғалар, халықтың бейбіт шеруде айтқан талаптары «естітін үкіметке» елдегі әлеуметтік-экономикалық проблемалардың қаншалықты ұшығып кеткенін көрсетіп берді. Экономист Марат Қайырленов мұның сырын көптеген бағдарламаның сапалық тұрғысынан сын көтермейтіндігінен деп түсіндіреді:

«Біріншіден, Үкіметтегі халықты еңбекпен қамтуға жауапты мамандардың кәсіби біліктілігі төмен. Салдарынан жобалар о баста дұрыс сарапталмайды, оларды іске асыру кезінде жемқорлыққа жол беріледі және қатаң қалағалау жасалмайды. Екіншіден, жобаларды жүзеге асыру үшін мемлекеттік механизмдердің өзі егжей-тегжейлі нақтыланбаған. Сондай-ақ Қазақстанда кәсіпкерлерге қаржылай көмек көрсететін 32 мемлекеттік қолдау институтының атқарымдық функциялары бір-бірімен шатысып жатыр. Адамдар соның бәрине барып, сабылып жүреді», — дейді экономист.

(Жалғасы 3-бетте)



Елбар КАБА (сөзбе)

## ЕЛДІҢ ШЕТІНДЕ, ЖЕЛДІҢ ӨТІНДЕ ҚАЛМАСЫН

Сөз жоқ, шекараны шегендеп, оның қауіпсіздігін қамтамасыз ету — тәуелсіздігіміздің басты жетістігі. Дегенмен дәл осы шекара сызығына таяқ тастам жерде күн кешетін халықтың әлеуметтік-экономикалық жағдайы мәз емес. Ресми статистика тәуелсіздіктің алғашқы жылдарымен салыстырғанда бүгінде шекараны бойлай қоныстанғандар санының бірнеше есе азайғанын айғақтайды. Тұрғындар санының кемуді былай қойғанда, шекара маңындағы елді мекендердің кейбірі әне-міне картадан жойылып кеткелі тұр.

6 >>



## Әкімдіктің ұрланған мүліктері табылды



Жаппай тәртіпсіздіктер кезінде біраз қаланың әкімдігіне залал келді. Тонаушылардың біразы бейнекамераға түсіп қалған. Соның арқасында қарақшыларды тауып, қолды болған мүліктер тәркіленіп жатыр. ІІМ Алматы облысы әкімдігінің ғимаратынан техника ұрланған күдіктілердің ұсталғанын хабарлады.

Полиция қызметкерлері жаппай тәртіпсіздік кезінде жасалған кезекті ұрлықты ашты. Алматы облысының Полиция

департаментінің Экстремизмге қарсы іс-қимыл басқармасының қызметкерлері Талдықорған қалалық Полиция басқармасы-

ның қызметкерлерімен бірлесіп, бүлік кезінде облыс әкімдігі ғимаратын тонаған күдіктілерді анықтады.

«Жедел-іздістіру іс-шаралары барысында Талдықорған қаласының 41, 37 және 24 жастағы үш тұрғыны ұсталды. Олар 5-7 қаңтар аралығында облыстық әкімдік ғимаратына заңсыз кіру арқылы тұрмыстық техниканы ұрланған деген күдікке ілікті. Олар екі тоназдық, екі кондиционер, мультипісіргіш, кеңсе креслосын, су сорғысын және басқасын ұрланған», — деді Алматы облысы ПД Экстремизмге қарсы іс-қимыл басқармасының бастығы Руслан Найзабаев.

Оның мәліметінше, күдіктілерге қатысты Қылмыстық кодекстің 188-бабының 3-бөлігі бойынша сотқа дейінгі іс жүргізу басталды. Күдіктілер кінәсын мойындаған, олар уақытша ұстау изоляторына қамалды. Өзге ақпарат тергеу мүддесі үшін жария етілмейді.

Ерік ЕРДЕНОВ

## Маңғыстау облысы әкімінің орынбасары ұсталды

Маңғыстау облысы әкімінің орынбасары Ғалымжан Ниязов ұсталды. Бұл туралы yuedilov Telegram-арнасы хабарлады.

«Ол қызметтік өкілеттігін асыра пайдалану фактісі бойынша сотқа дейінгі тергеп-тексеру аясында ұсталды. Өйткені сұйылтылған газдың бағасын көтеру салдарынан Маңғыстау облысында халық көтеріліп, жаппай наразылыққа шықты және т.б.», — делінген хабарламада.

Ш.КУЗЕКБАЙ



## Басшы да, қосшы да қысқарады



«Самұрық-Қазына» акционерлік қоғамы басқармасының шешімімен 4 еншілес компанияның басшысы қызметінен мерзімінен бұрын босатылды.

Атап айтқанда, «Самұрық-Қазына Инвест» ЖШС бас директоры А.Сұлтанов, Samruk-Kazyna Construction АҚ басқарма төрағасы Б.Сандықбаев, «Самұрық-Қазына Контракт» ЖШС бас директоры А.Ақылов, «Самұрық-Қазына Бизнес Сервис» ЖШС бас директоры С.Елшібеков уәкілеттіктері мерзімінен бұрын аяқталды.

Сонымен бірге басқарма Үкіметке жолданатын қорды реформалау бағдарламасын дайындау мерзімдерін бекітті.

Жаңа ұйымдық құрылым бекітілді. Оған сәйкес, қор қызметкерлері (248-ден 124-ке дейін) мен басқарушылар саны (10-нан 5-ке) екі есе қысқарады. Құрылымдық бөлімдерде де қысқарту жүргізіледі. Мұнан бөлек қордың шетелдегі өкілдіктерін жабу туралы шешім қабылданды.

Ш.АТЫХАНҰЛЫ

## Қымбатқа түскен қауіпсіздік



Ұлттық қауіпсіздік комитетінің экс-төрағасы Кәрім Мәсімов басшылық еткен тұста құзырлы органның қаржылық шығыны 1,7 триллион теңге болған.

«Қаңтар трагедиясы» кезінде мемлекетке опасыздық жасады деген күдікпен ұсталған Кәрім Қажымханұлы құпия қызметтің тізгінін 2016 жылы қолға алды. Содан бастап Ұлттық қауіпсіздік комитетін қаржыландыру көлемі жыл санап артып отырған. Мәселен, 2016 жылы бұл салаға 162,3 миллиард теңге қаржы қарастырылса, 2020 жылы құзырлы органның қаржылық шығыны 423,6 миллиард теңгеге дейін ұлғайған екен.

Ш.КУЗЕКБАЙ



Еркебулан ДУЙСЕБӨЛДІТОВ (солдан)

## Шәкіртақы тағы өседі

Мемлекет басшысының тапсырмасына сәйкес, 2022 жылғы 1 қыркүйектен бастап қазақстандық жоғары оқу орындарында оқитын студенттердің стипендиясы 20%-ға, магистранттар мен докторанттардың стипендиясы 15%-ға артады. Яғни, шәкіртақы жыл сайын өсіп жатыр.

Бұған дейін білім қуған жастар жаңа оқу жылында жоғарылатылған стипендия ала бастаған еді: 2021 жылдың қыркүйек айында бакалавр стипендиясының мөлшері 20%-ға, магистранттар мен докторанттар стипендиясының мөлшері 15%-ға ұлғайды. Осылайша, қазір студенттердің шәкіртақысы 31 423 теңге, маги-

странттардікі — 76 950 теңге, докторанттардікі — 172 500 теңге.

«Биылғы қыркүйек айынан бастап студенттердің стипендиясы тағы да 20%-ға өседі. Мысалы, педагогика мамандарын даярлау бағыты бойынша оқитын студенттер 58 мың теңгеден астам, басқа бағыттар бойынша білім алатындар 37 мың теңгеге жуық шәкіртақы ала бастайды. Магистранттардың шәкіртақысы 86 987 теңгеге дейін, докторанттардың шәкіртақысы 195 000 теңгеге дейін өседі», — деді БҒМ-нің Жоғары және жоғары оқу орнынан кейінгі білім департаментінің директоры Әділет Тойбаев.

Елдос СЕНБАЙ

## Бүлік кезінде ҚАРУ ТОНАҒАҒАНДАР

Еліміздің ішкі істер органдары қаңтардың басында болған жаппай тәртіпсіздік кезінде жоғалған, ұрланған қаруларды іздеп жатыр. Бұған қоса ел ішінде бұрыннан заңсыз сақталған қарулар да полиция қолына өтпек.

Таяуда Жамбыл облысында екі азаматтан заңсыз қару табылды. Рейд кезінде Досбол ауылының 43 жастағы тұрғынынан тіркелмеген 12 калибрлі тегіс ұңғылы аңшы мылтығы, 10 оқ-дәрі, 5 гильза және 4 қолдан жасалған пышақ шыққан. Сондай-ақ 24 жастағы осы ауылдың тұрғыны да аңшы мылтығын заңсыз сақтапты. Енді оларға қатысты әкімшілік хаттама толтырылды. Мұнымен қоймай Тараз қаласында арықтың ішінен иесіз қару-жарақ табылған. Қапқа оралған құралдардың арасында тегіс саңылаулы «Эс-корт» атыс қаруы шыққан. Аталған қаруға арнайы сот-баллистикалық сараптама тағайындалды. Қазір сотқа дейінгі тергеп-тексеру басталған.



Ал Қызылорда полицейлері жергілікті тұрғынның үйінен әскерилерге тиесілі қаруды тапты. Азамат АК-74 пен БП-25 қаруын 5 қаңтарда болған жаппай тәртіпсіздік кезінде тауып алғанын айтқан. Қазір Қылмыстық кодекстің бірнеше бабы бойынша сотқа дейінгі тергеп-тексеру жүргізіліп жатыр. Күдікті уа-

қытша ұстау изоляторына қамалған. Полицейлер бұл тұста қарудың, оқ-дәрілердің, арнайы құралдардың орны туралы хабарлаған немесе оларды полицияға өз еркімен тапсырған адам қылмыстық және әкімшілік жауапкершілікке тартылмайтын ескертіп отыр.

М.ТӨЛЕУ

## Блок-бекеттер ӘЛІ АЛЫНБАҒАН



Алматы қаласында төтенше жағдай режимі алынып тасталса да, қалаға кіреберістерде орнатылған блок-бекеттер жұмысын жалғастырып жатыр. Себебі аймақта террористік қауіптің «қызыл» деңгейі әлі де сақталып тұрғанға ұқсайды.

Қаланың аумағына бойынша ашылған бес стационарлық блок-бекет 8 қаңтардан бастап жұмыс істеп тұр. Оларға полиция қызметкерлерімен бірге Қарулы Күштердің 170-тен астам әскери

қызметшісі кезекшілік етеді. Жауынгерлік техникалар да орнатылған. Күзетшілері ар автомобильді іріктеп тексереді. Блок-бекеттер «Гүлдәла» кентінде, Думан шағынауданында, Жандосов және Карьерная көшелерінің қиылысында, Қапшағай трассасында және Райымбек даңғылындағы «Алтынорда» базары ауданында орнатылған. Ал ведомство әзірге құқық қорғау органдарының жұмысына түсіністікпен қарауды сұрап отыр.

М.ЖАЛҒАСҰЛЫ

## ЖОСПАРЛАНҒАН ЖОБАЛАР ЖҮЗЕГЕ АСТЫ

«Nur Otan» партиясы Түркістан облыстық филиалының ғимаратында аудандық, қалалық филиал төрағаларының бірінші орынбасарларымен мәжіліс өтті. Оған облыстық филиал төрағасының бірінші орынбасары, фракция жетекшісі Бейсен Тәжібаев төрағалық етті. Күн тәртібінде 2021 жылғы атқарылған жұмыстарды зерделеу, биылғы жоспарларды айқындау мен партияның ішкі жұмыстары қаралды.



Облыстық партия филиалы төрағасының бірінші орынбасары Бейсен Дәулетұлы партияның атқаруға міндетті барлық бағыттарына жеке-жеке тоқталды. Облыстық және аумақтық филиалдарының жұмыстарындағы оң нәтижелермен бөлісіп, сын-ескертпелер айтты.

«2021 жыл қорытындысы бойынша партияның қоғамдық қабылдау бөлмелеріне 22,6 мың адам жүгінген. Оларды қарау нәтижелері бойынша 15,8 мың мәселе оңтайлы шешіліп, 6,6 мың өтініш қаралып жатыр. Былтыр жалпы саны 3 095 қоғамдық қабылдау өткізілген. Депутаттар, әкімдер мен әкім орынбасарлары, мемлекеттік орган басшылары, тіпті заңгерлер, адвокаттар мен медиатор қызметкерлері партияның облыстық, аумақтық филиалдарында және ауылды жерлерде жеке, көшпелі қоғамдық қабылдаулар өткізіп, тұрғындармен жүзбе-жүз кездесті. Әрбір арыз-өтініш назардан тыс қалмады. Яғни азаматтармен жұмыс жүргіздеу айтарлықтай жетістіктер бар. Осы бағыттағы жұмыстарды тағы да жетілдіруді тапсырамын» — деді Б.Тәжібаев.

Сондай-ақ «Ардагерлерді ардақтайық», «Бақытты отбасы», «Қамқорлық» және «Ұлттық мұра» партиялық жобаларына да тоқталды. 2020 жылдан бастап «Қамқорлық» бағдарламасы бойынша 2 жылда 2 679 адамға көмек көрсетілді. Оның ішінде тұрмысы төмен 66 азаматқа тұрғын үй берілсе, 90 адам тұрақты жұмыспен қамтылып, 230 адам ақылы қоғамдық жұмысқа тартылған. 2 293

азаматқа азық-түлік, киім-кешек үлестіру секілді материалдық көмек көрсетілген.

Филиал төрағасының бірінші орынбасары Түркістан облысы бойынша партияның сайлауалды бағдарламасын іске асыру жөніндегі мониторинг жұмыстарын да тарқатып айтты. Орындалмау қаупі бар жобаларға тоқталды.

«Былтырғы жыл қорытындысы бойынша сайлауалды бағдарламадағы 1 595 іс-шараның 91,7%-ы іске асты, 6%-ы орындалу үстінде. Ал 421 іс-шараның басталу мерзімі бар. Халықтың тұрмыс-тіршілігін жақсарту мен ел экономикасын дамыту бағытында бағдарлама барлық саланы қамтитыны белгілі. Нақты іс-шаралар жоспарын қамтитын Жол картасы бар. Енді жұмыла кірісіп, оң нәтижелерді көрсету керек. Маңызды жобаларды қаржыландыруды мәслихат депутаттарымен, жергілікті әкімдікпен кояң-қолтық араласып, орындату қажет», — деді Б.Дәулетұлы.

Сондай-ақ бөлім басшылары Нұрлан Мейірқұлов пен Бекзат Біләловтің хабарламалары тыңдалды. Олар 2021 жылда атқарылған жұмыстарға жүргізген талдауларын баяндап, 2022 жылға қойылатын талаптарды айтты. Партия атынан ұсынылған облыстық, аудандық мәслихат депутаттарының рейтинг жүйесі қалыптасып, бүгінде жүйелі жұмыс істеп тұр. 6 ай сайын депутаттардың атқарған жұмыстары зерделенетін болады. Алғашқы нәтижелер ақпан айында жарияланады.

Би-Барыс КӨКШЕ

## МҰҚТАЖ ЖАНДАРҒА КӨМЕК КӨРСЕТІЛДІ

Жыл басынан бері 15 мыңнан астам алматылық мұқтаж жанға мәслихаттағы «Nur Otan» партиясы мен басқа да партиялар фракциялары тарапынан азық-түлік себеттері мен дәрі-дәрмек сатып алу үшін ақшалай көмек берілді.

Тек соңғы үш тәулік ішінде 10 аурухана азық-түлікпен қамтамасыз етілді. Төтенше жағдай кезінде зардап шеккен азаматтарға, құқық қорғау органдарының қызметкерлері мен әскери қызметшілерге қан тапсыру ұйымдастырылып, оған қалалық мәслихаттың 40 депутаты мен партия белсенділері қатысқан.

Партияның депутаттық фракция мүшелері Г.Бекенова, М.Сүлеев, М.Финогенов, З.Өмірбаева, А.Нәбиев және партия белсендісі Н.Даут түрлі дәрежедегі жаракат алған әскери қызметшілерге және Ұлттық ұлан бөлімшесіне барды. Оларға қолдау және алғыс айтылды. Сондай-ақ материалдық көмек көрсетілді.



Жалпы айтқанда, нұротандықтар Алматының барлық аудандарында мұқтаждарға ақшалай көмек көрсетті. Мысалы, «Арт Сәулет» ЖШС (Бауыржан Қайыпбаев) және Ordabasy Group корпорациясы (Сабыржан Зайнидинов) қайырымдылық

көмекке 35,5 млн теңгеден, «Атрикс-Строй» ЖШС (Әміржан Нәбиев) 21 млн теңге, «КазФерроСталь» ЖШС (Аида Бекманова) 6,8 млн теңге және «АЗМК» ЖШС (Шухрад Шардинов) 6 млн теңге бөлді.

Би-Барыс КӨКШЕ

## 4 МЫҢ ЖҰМЫС ОРНЫ АШЫЛДЫ

Кеше «Nur Otan» партиясы Павлодар облыстық филиалы төрағасының бірінші орынбасары Илья Теренченко кәсіпкерлік мәселелері жөніндегі Өңірлік үйлестіру кеңесінің отырысына қатысты.



Күн тәртібінде үйлестіру кеңесі «Бизнестің Жол картасы — 2025» бизнесті қолдау мен дамытудың мемлекеттік бағдарламасы шеңберінде өндірістік инфрақұрылымды қалыптастыру жөніндегі 4 жобаны қарастырды. Олар — «Масакпай Инвест» ЖШС, «Ақжар Өндіріс» ЖШС, «Бастаушы-AGRO» ЖШС және «КХ «Лидер PVL» ЖШС.

«Nur Otan» партиясының сайлауалды бағдарламасының Жол картасы аясында инвестициялық жобаларды тарту — басты шарттың бірі», — деді филиал төрағасының бірінші орынбасары Илья Теренченко.

2021 жылы Павлодар облысында шамамен 305 миллиард теңге инвестиция тартылды. Олардың есебінде 4 мың жана жұмыс орны құрылып, 12 ірі жоба іске асырылды. Тек аграрлық секторда ғана 30 инвестициялық жоба қосылды.

Би-Барыс КӨКШЕ

## ЖАСЫРЫН ЖҰМЫССЫЗДЫҚ ЖАРҒА ЖЫҒАДЫ

(Басы 1-бетте)

Дәулет АСАУ

Оның айтуынша, былтыр кейбір өңірлерде «Еңбекпен қамту» бағдарламасы үшін қарастырылған қаржы жыл аяқталар шақта ғана — қазан-қараша айында түскен. Ал 2-3 айда игермесе, кейін алып қоямыз деп тағы қорқытады. Сондықтан жоба операторлары бөлінген ақшаны қалай болса солай жаратуға жанталасады. Мұнан кейін қандай жұмыс сапасы туралы айтуға болады?!

Еңбек және халықты әлеуметтік қорғау министрі Серік Шәпкеновтің айтуынша, Қазақстанда 6,7 млн адам жұмыс істейтін 340 мыңнан астам белсенді кәсіпорын бар. Ал жұмыссыздар саны 450 753 адамды құраған. Алайда жасырын жұмыссыздық деңгейінен одан әлдеқайда жоғары екені белгілі.

Айталық, бұлтыр көптеген дамыған елде эпидемиологиялық ахуалға байланысты еңбек нарығындағы жағдай құлдырап, жұмыссыздық көрсеткіші 10-15%-ды маңайлаған. Мәселен, АҚШ-та жұмыссыздық деңгейі бір жылда — 8,1%-ға дейін, Канадада — 9,6%-ға, Испанияда 15,5%-ға дейін артқан. ТМД-ның басқа елдерінде де жұмыссыздықтың өскені байқалады: Арменияда (+4 пунктке), Эстонияда (+2,3 пунктке), Украинада (+1,7 пунктке), Өзбекстанда (+1,6 пунктке).

Ал біздегі жұмыссыздық 2020 жылы небәрі 0,1 пунктке артып, 4,9%-ды құраса, 2021 жылғы ресми статистика сол қалпында қалып отыр. Бұған қарап, Қазақстан жұмыссыздықпен күресте әлем елдерінің алдына шығып кеткен бе дерсің?! Бірақ ол цифрға әлеумет те, сарапшылар да сенбейді.

### МЕМЛЕКЕТТІК БАҒДАРЛАМАЛАРДЫҢ ПӨРМЕНИ ЖОҚ

Республикалық бюджеттің жартысынан астам бөлігі әлеуметтік салаға бөлінгені, халықтың тұрмысын жақсартуға бағытталды. Бірақ осы қаржыны халық игілігі үшін тиімді пайдалану тұрғысынан келгенде кем-кетік көл-көсір.



«Жұмыссыздық деңгейін төмендету шығындарының едәуір бөлігі уақытша жұмыс орындарын ашуға жұмсалған. Соның салдарынан адамдар орташа алғанда небәрі 1-3 айға ғана уақытша еңбекпен қамтылады. Еңбек министрлігі мен әкімдіктер көп жағдайда жүздеген миллиард құйылып жатқан еңбек бағдарламалары аясында жылдам орындалатын, тиімділігі аз жобаларға басымдық береді. Есеп комитетінің дерегіне, дағдарысқа қарсы жобалардың бар-жоғы 14%-ы ұзақмерзімді экономикалық активтерді және объектілерді құруға бағытталған. Осыдан әлеуметтік саланың әлсіздігін өтейтін әдеттегі модель сәтсіздікке ұшырай бастады», — деді Парламент Сенатының депутаты Айгүл Капбарова.

Сондай-ақ мемлекет тарапынан кәсіпкерлерге қаржылай қолдау көрсету ісі де ақсап жатыр. Мәселен, отандық өндіру-

шілерге «Еңбек» бағдарламасы шеңберінде микронесие беріледі. Мемлекет басшысының тапсырмасына сәйкес, сол арқылы шағын және орта бизнестің ЖІӨ-дегі үлесін 2025 жылға қарай 35%-ға дейін жеткізу, жұмыспен қамтылғандар санын 4 миллион адамға дейін ұлғайту көзделген. Алайда микронесиегерді бөлумен бірнеше мемлекеттік органдардың қаржы институттары айналысатындықтан, бұл істе бірізділік жоқ. Соның кесірінен қазынадан бөлінген несиенің құны 0,01%-дан 6,0%-ға дейін қымбаттаған.

Одан бөлек, 2017-2021 жылдары «Бастау Бизнес» жобасы бойынша 165 мың тыңдаушыны оқытуға мемлекеттік қолдаумен 13,1 млрд теңге қарастырылған. Бірақ қазынадан мұншама қаржы құйылған жобаның нәтижесі көңіл көншітпейді. Соңғы үш жыл ішінде жобаға қатысқандардың тек 24,4%-ы өз бизнесін ашқан. Сон-

дай-ақ жұмыс орындарының тапшылығынан немесе жалақының мардымсыздығынан жыл сайын ЖОО бітірген жастардың елеулі бөлігі екі қолдарына бір күрек таппай, сенделіп жүр: 2018-2020 жылдары аралығында жұмыссыз түлектердің үлесі 76,2%-дан 68,2%-ға төмендеген. Тағы бір мәселе, «Серпін» жобасы бойынша 2018-2020 жылдары берілген гранттардың 55%-ы талап етілмеген күйінде қалған.

Сенатор «Жұмыспен қамтудың Жол картасы» бағдарламасына бөлінген қаражаттың тиімді жұмсалып кеткеніне қалай жеткізіп отырғандығын сұрады. «Еңбек» бағдарламасына қосымша инфрақұрылым объектілерін салу және дамыту есебінен жұмыс орындарын көбейту керектігін айтты.

«Өзін-өзі «өнімді жұмыспен» немесе «өнімсіз жұмыспен» қамтитын деген түсініксіз санаттағы адамдардың күнкөріс деңгейі әлеуметтік тұрғыдан кешенді зерттелуі тиіс. Икемді еңбек нарығын жетілдіргенде алдымен қоғам дамуының ең басты авангарды — жастарды тұрақты жұмыспен қамту мәселесін шешу керек», — деп түйіндеді Айгүл Капбарова.

### АУЫЛДЫҚТАР ЕКІ ҚОЛҒА БІР КҮРЕК ТАППАЙ ЖҮР

Жалған статистика ауылдағы нақты жұмыссыздық жағдайын да жасырып, жауып тұр. Шалғай жерлерде көптеген тұрмыстық-әлеуметтік мәселелердің шешілуінен ішкі көш-қон жылдан-жылға ұлғаю түскен. Тек 2019-2020 жылдары ауылдан қалаға 880 мың адам қоныс аударған. Қазір еңбекке қабілетті халықтың 41%-ы ауылдан қалаға көшуді қалайды. Ал ірі мегаполистерде тұрғындар санының өсуі еңбек нарығына қысымды одан сайын күшейте түспек.

Әрине, урбанизацияның әлемдік үрдісі екені түсінікті, бірақ оны реттеп отыру керек қой. Егер қалаларға жаппай қоныстану басталса, ауыл шаруашылығында кім жұмыс істейді, мемлекеттің азық-түлік қауіпсіздігін қалай қамтамасыз етеміз? Шекаралас аудандар қалай қорғалмақ? Ауылдық аймақтардың ахуалын реттеу

экономикалық қана емес, саяси, стратегиялық маңызы бар күрделі мәселе.

Президент Қасым-Жомарт Тоқаев мемлекеттік органдардың құрғақ цифрлар ойын доғарып, елдің тұрмысын жақсарту бойынша нақты тапсырма берді. Халық болса, Үкімет қазіргі жағдайды ескере отырып, жұмыспен қамту бойынша қандай шаралар қабылдап жатыр деп алаңдаулы.

«Біз, бір топ сенаторлар, Үкімет басшысына ресми органдар ұсынған бояма сандардың ауыл өмірінің шындығына сәйкес келмейтінін айттық. Статистика бойынша ауылдағы жұмыссыздар саны 181 мың адам немесе 4,7%. Бірақ іс жүзінде одан әлдеқайда көп. Біз республиканың барлық аудандарында арнайы әлеуметтік сауалнама жүргіздік. Олардың басым көпшілігі басты мәселе деп жұмыстың жоқтығын атады. Осы сауалнамада көрсеткендей, ауыл тұрғындарының нақты табысы айына 35 мың теңгені құрады. Мұндай ақшаға қалай күн көруге болады?» — деп кейіні тағы бір сенатор Ақылбек Күршібаев.

Үкімет ауылды дамыту үшін әр жылдары түрлі бағдарлама әзірлеген. Қазіргі осы мақсатта «Ауыл — ел бесігі» жобасы қабылданған, бірақ оған жеке ұлттық жоба мәртебесі берілмеген. Ал ауылға басымдық беретін дербес құжат жасалмай, бұл бағытта үлкен жетістіктерге қол жеткізудің де ауыршылықтары бар. Депутаттар, сондай-ақ бұл жобаны жүзеге асыруды Ұлттық экономика министрлігінің қарамағынан алып, Ауыл шаруашылығы министрлігіне беруді ұсынған еді, әзірге бұл ұсыныс та ескерілгені жоқ. Өйткені кез келген ауылды дамытудың негізінде ауыл шаруашылығы өндірісін дамыту мәселесі жатқанын ұмытпаған жөн.

Бүгінде бірақтар елді мекендер ірі ауыл шаруашылығы кәсіпорындары мен шаруа қожалықтарының арқасында өмір сүріп келеді. Шалғай жерлердегі бірден-бір жұмыс беруші солар. Дегенмен әкімдердің шешімдерінің арқасында, өйтпесе өздерінің пысықайлығымен ірі жер пайдаланушыларына (лаифундистер) айналған көптеген үлкен компания әлі де болса «ауылдың ішкі жағдайына бас ауыртпай, егін егуге және егін жинауға ғана келетіні» жасырын емес. Ал Үкімет пен жергілікті атқарушы билік мұндай жосықсыз компаниялардың әлеуметтік жауапкершілігін арттырып, аймақтарды дамытуға міндеттейтін болса, онда елді мекендердегі жұмыссыздық қана емес, басқа да көптеген проблеманың шешілуіне сеп болар еді.









